

Monumento 18 di Maart

DUNA HONOR NA ARUBIANONAN HUMILDE CU A HINCA E LUCHA

Un di e aspectonan bunita di e " MONUMENTO 18 DI MAART " ta cu en esencia e ta duna honor na un grupo grandi y nan lider. E lider ta Shon A Eman. E grupo ta e Arubianonan cu na aña 1947-1948 a uni forza pa hunto presenta e mocion pa Aruba goberna su mes y haya su "Status Aparte". E ta e dunamento di honor na tur e Arubianonan humilde, hopi tata y mama di nos awe, cu e tempo ey caba a wak e husticia di e lucha pa Aruba maneha su mes un asunto. Cu e worde goberna door di su propio hendenan, pa su propio hendenan. Ki mas bunita ta duna honor na e hendenan cu cua y pa cua a hiba e lucha pa mas cu 60 aña. Ki mas bunita ta pa gradici esnan, nos mayornan y abuelonan cu den un epoca hopi diferente, hopi mas dificil den tur sentido, a lanta para y a uni pa exige respet pa nos mes. Cu a lanta den tur bario di nos isla y a firma e

actonan pa mustra Reino Hulandes y henter mundo cu e isla chikito aki, ta conta. Y cu su hendenan mes kier percura pa nan futuro. Esaki ta e hendenan cu a uni sin distincion di ningun, homber y muhernan balente, cu a bisa cu " nos kier ta baas den nos propio cas. Nos kier goberna nos mes. Nos kier Status Aparte !

PORFIN

Tur rond di mundo ta rindi honor na heroenan nacional, pero masha poko ta wak cu Pueblonan mes ta worde honrá. Cu e "MONUMENTO 18 DI MAART" Aruba ta honra no solamente e persona cu a cana di cas pa cas den tempo cu transportacion tabata scars, cu luz tabata un luho y pobresa tabata grandi na Aruba, pa concientiza nos Pueblo di un mihor futuro den cua Arubianonan lo ta doño di nan propio destino. E Pueblo a kere den e ideal aki y a uni cu

Shon A Eman pa logra esaki. E mes no a wak e final. Pero e tabat otro Arubianonan cu a kere den e ideal y a sigui cu e lucha. Betico Croes, cu Shon A mes a pidi pa drenta politica asigui cu e lucha cu un forza nobo y cu sosten di

Pueblo. E Pueblo mes no a bandona e lucha pa e ideal aki. Ta e Pueblo aki, en especial esnan cu a sostene semper e lucha aki, ta worde honra ariba e monumento aki. Nan nombrenan lo keda graba pa semper den

memoria di nos Pueblo. E monumento ta halza nan na e nivel di pioneronan di nos patria. Pasobra ta nan a haci cu na 1948 por a entrega e mocion na La Reina y cu a pone e base pa e Status Aparte cu nos ta biba aden awe.